

आकाशवाणी रायपुर (छत्तीसगढ़)
प्रादेशिक समाचार (छत्तीसगढ़ी)

1810 शनिवार

10.08.2024

प्रमुख समाचार –

- 1— केंद्रीय मंत्रिमंडल ह प्रधानमंत्री सहरी आवास योजना के दूसरइया चरण ल मंजूरी दे देहे— ए योजना म तीन करोड़ नवा घर बनाय जाही।
- 2— जशपुर जिला म जंगली हाथी के हमला म एक लइका समेत चार मनखे के मउत हगे।
- 3— बीजापुर जिला म तीन माओवादी मन ह आत्मसमर्पण करे हे— एमा दू माओवादी मन उपर अठ—अठ लाख रूपिया के ईनाम रिहीस।

केंद्रीय मंत्रिमंडल—मंजूरी

केंद्रीय मंत्रिमंडल ह प्रधानमंत्री सहरी आवास योजना के दूसरइया चरण ल मंजूरी दे देहे। मंत्रिमंडल ह वित्त बछर दू हजार चौबीस—पचीस ले दू हजार अट्ठाईस—उनतीस के बीच प्रधानमंत्री ग्रामीण आवास योजना ल लागू करे जाय के घलो मंजूरी देहे। केंद्रीय सूचना और प्रसारण मंत्री अश्विनी वैष्णव ह पत्रकार मन ल बतइन कि ए योजना म तीन करोड़ नवा घर बनाय जाही। श्री वैष्णव ह बतइन कि योजना के तहत सहरी क्षेत्र म काम—बूता करइया माईलोगिन बर हास्टल बनाय के प्रावधान हवय।

मंत्रिमंडल ह कृषि और किसान कल्याण मंत्रालय कोति ले प्रस्तावित स्वच्छ संयंत्र कारीकरम ल मंजूरी देहे। उहें, मंत्रिमंडल म उन्नत जैव ईंधन परियोजना ल वित्तीय सहायता देबर संवर्धित प्रधानमंत्री जीवन योजना ल घलो मंजूरी दे गेहे। बइठका म अनुसूचित जाति अउ अनुसूचित जनजाति आरक्षण उपर सर्वोच्च न्यायालय के हालेच के बेवस्था उपर बिस्तार ले गोठबात होइस।

ओबीसी आयोग

राज्य सरकार ह अन्य पिछड़ा वर्ग के सामाजिक अउ आर्थिक अध्ययन बर छत्तीसगढ़ पिछड़ा वर्ग कल्याण आयोग के गठन करे हे। सेवानिवृत्त आईएएस अधिकारी आर.एस. विश्वकर्मा ल ए आयोग के अध्यक्ष बनाय गेहे। सुप्रीम कोर्ट के आदेस के बाद बने ए आयोग म अध्यक्ष ल मिलाके कुल सात सदस्य हवय।

सुनइया मन ल बतादन कि ओबीसी कल्याण आयोग एक तकनीकी आयोग हवय, जेला एक निश्चित बखत बर बनाय गेहे। अपन रिपोर्ट देके बाद ए आयोग ह खुदे खतम हो जही। राज्य सरकार ह छत्तीसगढ़ पिछड़ा वर्ग कल्याण आयोग बर तीन महिना के समय निर्धारित करे हे।

हर घर तिरंगा—अभियान

‘हर घर तिरंगा’ अभियान के तहत प्रदेश म आने—आने कारीकरम होवत हे। इही कड़ी म उद्योग और श्रम मंत्री लखनलाल देवांगन ह कोरबा कलेक्टोरेट परिसर म काली हर घर तिरंगा अभियान के सुरुआत करीन। एमा ओमन आम नागरिक अधिकारी अउ कर्मचारी मन ल स्वतंत्रता सेनानी, वीर सपूत मनके भावना के सम्मान करे अउ देस के विकास अउ प्रगति बर समर्पित रहे के सपथ देवाइन।

आईटीआई-अपग्रेड

युवा मन ल रोजगार ले जोड़े बर प्रदेश के एक सौ साठ आईटीआई ल मॉडल आईटीआई के रूप म संवारे जावत हे। एखर बर रोजगार और प्रसिक्षण विभाग कोति ले चार सौ चौरासी करोड़ रुपिया ले जादा के रासि मंजूर करे गेहे। मॉडल आईटीआई म युवा मन ल स्थानीय उद्योग के मांग अनुसार प्रसिक्षण दे जाही।

जशपुर-हाथी हमला मौत

जशपुर जिला म पाछू रतिहा जंगली हाथी के हमला म एक लइका समेत चार मनखे के मउत होगे। मृतक मन म एके परिवार के तीन झन सदस्य सामिल रिहीन। घटना के सूचना मिलत ही वन विभाग अउ पुलिस के टीम ह जांच म जुट गेहे। आकाशवाणी संवाददाता ले मिले जानकारी अनुसार बगीचा नगर पंचायत के गम्हरिया वार्ड नंबर- नौ म कच्चा घर म एक परिवार के छै झन सोवत रिहीन। इही बीच एक जंगली हाथी ह घर ल बसकाय के बाद ओमन उपर हमला कर दीस, जेमा दू झन मनखे के मउका म मउत होगे। उहें, हाथी के चिंघाड़ ल सुन के मउका म पहुंचे दू आने लोगन उपर घलो हाथी ह हमला कर दीन, जेखर ले ओ दूनो झन के मउत घलो होगे।

डीएफओ ह घटना के पुष्टि करे हे। क्षेत्र म वन विभाग अउ हाथी मित्र के टीम सरलग निगरानी करत हे। फेर जेन हाथी ह ए हमला करिस हे, ओखर आदत घर तोड़े अउ लोगन मन उपर हमला करे के ही होगे हे। ओमन बतइन कि जिला के चार वन परिक्षेत्र म अड़तीस झन हाथी किंजरत हे, जेमा पंद्रह झन अकेल्ला घूमत हे। ओमन बतइन कि ए हाथी मन ल दूसरइया जघा सिप्ट करे के योजना बनाय जावत हे। शासन के आदेस के बाद आगू के कार्रवाई करे जाहीं डीएफओ ह बतइन कि वन अमला कोति ले मृतक के घरवाले मन ल तुरते पचीस-पचीस हजार रुपिया के मुआवजा रासि दे गेहे।

सुनइया मन ल बतादन कि जिला म एक महिना म हाथी के हमला ले अब तक नौ झन मनखे के मउत होगे हे।

माओवादी-आत्मसमर्पण

बीजापुर जिला म तीन माओवादी मन ह पुलिस अधिकारी के आगू आत्मसमर्पण करे हे। एमा दू माओवादी मन उपर अठ-अठ लाख रुपिया के इनाम रिहीस। अतिरिक्त पुलिस अधीक्षक सुनदीप सरकार ह बतइन कि आत्मसमर्पित माओवादी मन म पीपुल्स लिबरेसन गुरिल्ला आर्मी के दू सदस्य सामिल हे। ओमन बतइन कि माओवादी संगठन के विकास विरोधी, भेदभावपूर्ण नीति अउ उपेक्षा के सेति ए माओवादी मन ह आत्मसमर्पण करे हे। एमन ल राज्य सरकार के पुर्नवास नीति अंतर्गत पचीस-पचीस हजार रुपिया के प्रोत्साहन रासि दे गीस।

सुनइया मन बतादन कि बीजापुर जिला म पाछू छै महिना म एक सौ पैतालिस माओवादी मन पुलिस के आगू आत्मसमर्पण करे हे। उहें, सुरक्षाबल के टीम ह तीन सौ छब्बीस माओवादी मन ल गिरफ्तार करे हे।

स्वाइन फ्लू-मौत

प्रदेस म स्वाइन फ्लू ले दे माईलोगिन मनके मउत हगे हे। उहें, सात इन पॉजीटिव मरीज घलो मिले हे। मिले जानकारी अनुसार मृतक म एक माईलोगिन ह कोरिया जिला के अउ दूसर ह जांजगीर-चांपा जिला के रहइया रिहीस। दूनो इन ल इलाज बर बिलासपुर के एक निजी अस्पताल म भर्ती कराय गे रिहीस, जिहां इलाज के बीच दूनो के मउत हगे।

इही बीच, स्वाइन फ्लू के लक्षण के आधार म नौ इन पीड़ित के एचवन-एनवन टेस्ट कराय गीस, जेमा सात इन पॉजीटिव पाय गीस। एमन म बिलासपुर जिला के चार, गौरैला-पेण्ड्रा-मरवाही जिला के दू अउ जांजगीर-चांपा जिला के एक मरीज सामिल हे।

जांजगीर-डायरिया

जांजगीर-चांपा जिला के अमोदा गांव म डायरिया ले दू लइका के मउत हगे। उहें, दस ले जादा लोगन पीड़ित हे। मिले जानकारी अनुसार जादा बीमार सात इन ल नवागढ़ के अस्पताल म भर्ती कराय गेहे। बीमार मन म अधिकतर लइका मन हवय। स्वास्थ्य विभाग के टीम ह गांव म सिविर लगाके लोगन मनके स्वास्थ्य जांच करत हे।

जीपीएम-समीक्षा बैठक

गौरैला-पेण्ड्रा-मरवाही जिला के कलेक्टर लीना कमलेश मंडावी ह आज अधिकारी मनके बइठका लेके राजस्व विभाग के काम-बूता के समीक्षा करीन। बइठका म ओमन जिला म नक्सा बटांकन के एक लाख तीस हजार ले जादा प्रकरण के लंबित होय ले गुस्साइस अउ राजस्व निरीक्षक मन ल पटवारी हल्का अनुसार रोज सौ नक्सा बटांकन के लक्ष्य देत हुए काम पूरा करे बर किहीन। ओमन किहीन कि नक्सा बटांकन के काम म प्रगति नइ दिखे ले राजस्व निरीक्षक मन के वार्षिक वेतन वृद्धि रोक दे जाही।

जिले की चिट्ठी

आकाशवाणी रईपुर के प्रादेशिक समाचार एकांश डहार ले प्रस्तुत कारीकरम "जिले की चिट्ठी" के प्रसारण काली संज्ञा छै बजके पांच मिनट ले छै बजके दस मिनट तक करे जाही। ए कारीकरम ल प्रदेस के जम्मों आकाशवाणी केंद्र एके संघरा रिले करही। ए दारी के अंक म "बस्तर" जिला के बारे म जानकारी दे जाही।

हल्बी / गोण्डी-समाचार बुलेटिन

काली ईतवार के "हल्बी" अउ "गोण्डी" बोली म समाचार बुलेटिन परसारित करे जाही। ए दूनो बुलेटिन आकाशवाणी केंद्र, जगदलपुर ले परसारित होही। जेला बस्तर संभाग म ही सुने जा सकही। हल्बी म समाचार बुलेटिन बिहनिया साढ़े सात बजे अउ गोण्डी म समाचार बुलेटिन संज्ञा साढ़े छै बजे परसारित करे जाही।

मौसम

मौसम विभाग ह काली प्रदेश म एक-दू जघा म गरजे-लउके के संग बरसा होय अउ गाज गिरे के चेतावनी देहे। विभाग के अनुसार एक द्रोणिका पूर्व-दक्षिण-पूर्व कोति उत्तर-पूर्व बंगाल के खाड़ी तक हवय। उहे, दक्षिण पूर्व उत्तरप्रदेश के उपर हवा के एक चक्रीय-चक्रवाती घेरा घलो बने हे। एखर असर ले प्रदेश म काली कई जघा म हल्का ले मध्यम बरसा होय अउ गरजे-लउके के संग छीटा पड़े के संभावना हे।

